



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

ig tiryimym@aolima

yt tir yimym

TAPAK 7

Modi-i 'PM Surya Ghar' vojana sangdongogo

Taoba Thailand PM Thaksin Shinawatra tepuokdak nungi chioktsü



VOL. XXI ISSUE NO. 122 (ADOK 122) DIMAPUR RASEMNÜ (WEDNESDAY) TSÜKLAI (FEBRUARY) 14, 2024 ₹ 5.00

Nagaland nung yimtsüing tasen 8 recognized asür

Dimapur, February 13, 2024 (TYO): Nagaland cabinet-i February 8, 2024 nü state nung yimtsüing tasen 8 agizükogo.

Nagaland sorkari agizükba yimtsüing 8 rongnung Wokha district kübok yimtsüing ana aser Longleng, Shamator, Noklak, Chümoukedima, Niuland o Mon kübok district kaka dena lir.

Nagaland nung recognised villages tasentem:

Chingtok Village, Longleng District

Kesangwong Village, Shamator District

Hanyuk Village, Noklak District
Chen Village, Chümoukedima District

Hokuto Village, Niuland District
Tongtiyan Village, Wokha District

Mnyan Village, Wokha District
Chaoha Chingha Village, Mon District

Nagaland police-i Nagpur nung ashikülaker 2 apu

Dimapur, February 13, 2024 (Agencies): Maharashtra kübok Nagpur nung alir nisung anati Nagaland nung doctor ka ashiooktsüba atema Nagaland Police-i tena puogo.

Nagpur nung alir Amul Prakash Tong (40) aser Prateek Jairam Nikhade (35) nati sports equipment yoktsü ta shia doctor ashiooktsü.

"Tenati Nagpur nung sports equipment aser furniture sales office ka lapoka lir. 2021 küm Dimapur nung doctor kati Tong aser Nikhade dang game zone ka

lapoktsü atema osettsüet alizüktsü jembitep. Idangji parnok tsüingda tangatetep kati aru aser doctor-i Rs 55 lakh agütsü saka tenati osettsüet meyok" ta Dimapur police ketdangsur kati ashi.

Iba atema Dimapur Police tsüingda ken o ka benok aser bushisüingdanga arur February 10, 2024 nü Nagpur Police teyari agia tena apu.

Okadakia Amul Prakash Tong aser Prateek Jairam Nikhade na Nagaland Police ket nung ayutsü temelaba agütsüogo.

Dimapur nung gender campaign agi

Dimapur, February 13, 2024 (DIPR): February 13, 2024 nü Tourist Lodge Dimapur nung gender campaign indang workshop ka ayongzüka agi.

Sentong nung Moa Sangtam NCS-i tesentepertem pelaa agizükdang awareness program ajanga tetsürtem temetentem metetdaksütsü aser nübertem dang tetsür-tebur bendanga amshiba aser ozüing alema inyaksangshiba osang lemsateptsü atema agir ta ashi.

Moa Sangtam ya Project Director (PD) cum District Mission Manager (DMM) District Mission Management Unit (DMMU), District Rural Development Agency (DRDA) inyaker.

"United Nations kübok linük 193 nungi 21% nung tetsür prime minister tem lir. Tanü tetsürtemi lenisüba menden nung amener ajisüaka asen state meyipa reprangdangra tetsürtem shilem timi magiteti timtemer anungji nübertem tangatetba melentsüla" ta Moa-i ashi.

Paisa NRLM ajanga mapa inyakba lemsatep aser parnoki campaigns, capacity training programs aser orientation sentongtem agir ta ashi.

"Tetsür-tebur kasa jenjang nung alitsüba pungmang ataloktsü ano mapang talangka lir saka kija shia nem temeten, maongka aser rongsen tsütsü kasa temeten agütsütsüla" ta State Commissioner of Person with Disabilities tenung nung Ashe Kiba-i jembidang ashi.

Matamabensaba tetsürtem balaka bendanga amshir aser narongjaker, o mejembiteter,

nükpoker aser shisatsü agi tangar memenepertem dak tenük yoka inyaksangshir, ta Ashe-isa ashi.

Lasia Rights of Persons with Disabilities Act, 2016 indang jemi aser iba ajanga matamabensaba nisungtem temeten kümzüka ayur ta ashi.

"February 13 ya National Women's Day amonger aser iba anogo nung gender campaign sentong agiba ya kanga temsüa lir. Naga nungeri tebur indang ken mejema atener saka iba tangatetba melenshitsu" ta Sisterhood Network, Dimapur Director Azungla James-ia ashi.

"Teburi dang senmang amangba, jala melena jabaso ang aginüba tangatetbatem ajanga asen loktiliba nung tetsür-tebur tebandang adoker. Telemetba agiba sabang nung tetsürtem medendaksüba, jabaso masoba kinungtsütem balazüka yutsüba, kilong nung o agi merenshiba, tekolok nung timtem agütsüba, tetsür dak teka sangshiba aser tamangba tsütsü tebur ang temaba ama jembishinüba ajanga tetsür o tebur tsüingda bendanga amshir" ta Azungla-isa ashi.

"Gender campaign ya tetsürtem atema dang masü saka tebur o tetsür külemi inyakba campaign ka asütsüla. Teburtemi pei tetsü, tetsü (grandmother), adianu, jala, kinungtsü, külemi inyaksema tetsür aser tetsür medemertem asoshi campaign asütsüla" ta laisa shisem.

Sentong nungsa District Legal Services Authority Network, Dimapur nungi Advocate Sangto Longchar aser Prodigals Home Director K. Ela natia o jemi.

Nagaland Cabinet-i mapa inyaker kar regularized asütsü lemtet

Kohima, February 13, 2024 (Agencies): Nagaland Cabinet-i School Education Department kübok contract mesüra ad-hoc employees regularization asütsüba policy mulunga agizükogo.

June 6, 2016 matongdang sanctioned posts nung aniokertem aser küm 10 tema inyaka arurtem regularized asütsü. Iba lemtet ya February 8, 2024 nü Kohima nung cabinet senden ka amendang agia liasü.

State Cabinet-isa September 27, 2019 nü P&AR Department Office memorandum sülen sanctioned posts nung regular appointments asürtem ajak anioktsü aser permanent PIMS

number agütsütsü lemtetogo.

Nagaland sorkarisa April 30, 2024 tashi temporary PIMS maparen inyaksü mapang atsülangtsüogo. Parnoki department nung ketdangsurtem dang inyakyim tim agi mapa nung nisungtem anioktsü nenshia metetdaksüogo.

March 14, 2015 nungi tenzüker October 3, 2022 tashi nung Power aser PHE Department tem nung work charged appointments asür ajak Operation & Maintenance Staff ama anioktsü Cabinet-i lemtet.

Nagaland Cabinet-i Nagaland Legislative Assembly züngsemtem salaries, allowances aser tanga facilities tajungba

kümtsütsü aser ex-Members aser ex-Interim Body Members pension teimba agütsütsü mulunga agizükogo.

Parnokisa Department dang meta talang pilar alidak MLA nem vehicle maintenance atema 10% talila agütsütsü tetuyuba agütsüogo. State Cabinet-isa MLA shia nem financial advance Rs 20 lakh agütsütsü shidangogo.

Cabinet senden nungsa Nagaland state nung AIS Standards ama public service vehicles nung Vehicle Location Tracking System mapa tenzüktü lemtet. Iba mapa ya Nirbhaya Framework kübok Tetsürtem aser Tanurtem kümzüka ayutsü atema lir.

SIDBI-i Nagaland nung Rs 100 crore tema endoktsü



Sovima nung MoU ka nung sign sütepa sülen Nagaland chief minister Neiphiu Rio, Small Industries Development Bank of India (SIDBI) Chairman & Managing Director Sivasubramanian Ramann aser tangartem külemi agiba noksa ka angur.

Kohima, February 13, 2024 (TYO): Small Industries Development Bank of India (SIDBI) aser Nagaland sorkar tsüingda MoU ka nung sign sütepogo.

Rs 100 crore tema MoU ya Micro Small and Medium Enterprises (MSME) aser saisapongertem yaritsü atema sign sütep.

SIDBI ajanga India nung micro, small aser medium enterprise finance companies license aser inyakyim ketdang asür. SIDBI ya Ministry of Finance, Government of India kübok lir.

Mapatong pezü rongnung SIDBI Cluster Development fund dena lir aser iba nung common facility centres lapoktsü aser district 16 nung MSMEs; Swavalamban Connect Kendras (SCK) nung industrial infrastructure atema Rs 100 crore agütsütsü nangzükogo.

SIDBI-isa Nagaland Olympic Association ajanga sports scholarships 5 agütsütsü metetdaksü aser iba ya saisaponger pungu training atema nisung shia Rs 5 lakh

agütsütsü.

SIDBI-isa entrepreneurs yaritsü atema seed funds agütsütsü.

Investment and Development Authority of Nagaland (IDAN) Conference room nung jembidang SIDBI Chairman and Managing Director S. Ramann "Nagaland nung alirtem dak shisaliok sempet tajungtiba lir saka nisungtemi shishilembatsü ya mapa tasak ka ama bilemer" ta ashi.

2017 küm Centre sorkari SIDBI nem Rs 10,000 crore agütsü aser 2018 nungibo SIDBI ajanga 120 funds- Alternate Investment Fund (AIF) agütsüogo, ta Ramann-ia ashi.

"Iba sen ya startups atema agütsüogo saka Nagaland nung AIF ka danga magütsüba atema ratar. SIDBI-i Dimapur nung aliba office ajanga SIDBI maparen osang prokshitsu" ta pai ashi.

Nagaland sorkar aser IDAN, Nagaland külemi yaritepa ajanga Startups aser Unicorns tajungba akümtsü imlar ta S. Ramann-isa metetdaksü.

"Nagaland nung

entrepreneurship ya tang ang tenzüker anungji startups aser unicorn tuluka yaritsü nungdaker" ta Industry & Commerce Advisor Hekani Jakhalu Kense-ia ashi.


"Asen Chief Minister Neiphiu Rio-i asen state rongsenketzüng renloktsü süra tamasa local entrepreneurs renloktsüla ta jangjangia shiogo" ta Hekani-isa ashi.

"Tetsüiba nung Naga nungeri shishilembatsü aaka bilem kechiyong sorkar mapaji asenok asoshi konang ka ama züngshi. Tanü Naga nunger atema startups aser unicorns ya tasen lir. Nagaland nung tang incubation centers 5 den startup policy ka lateta lir" ta laisa ashi.

Nagaland nung Self Help Groups (SHGs) junga inyaka odar aser state ajungalen SHGs 14500 shi lir ta Advisor Hekani-isa ashi.

"SIDBI-i Nagaland nung tetsüing ajemoka inyaksü tenzükba atema kanga pelar. Nagaland sorkar aser lanur entrepreneurs-i SIDBI nungi teyari agitsü renema lir" ta laisa shisem.

CPHCs kübok Medical Officers training tenzükogo



PHCs & UPHCs nung Medical Officer tem noksa nung angur

Dimapur, Tsüklai/February 13 (TYO): Comprehensive Primary Health Care (CPHC) kübok Primary Health Centers (PHCs) aser Urban Primary Health Centers (UPHCs) nung Medical Officers atema Expanded Packages of Services indang anogo pongu training ka February 13, 2024 nü tenzükogo.

Iba training tenzüksü lia Directorate of Health & Family Welfare, Kohima indang Conference Hall nung sentong tatsüka agiba nung V Kezo, Commissioner & Secretary, DoHFW ajanga Medical Officers tem den jembidang, healthcare ya meimchir asoshi temeden tongtipang ka akumer aser iba training ya ajanga pei mapa nung tali asendenshitsu imlar, ta ashi.

Chunlikha PHC-i yimya balaka nung Health Units anepaluba atema pai tenüngsang agütsü aser iba ya ajanga asen teinyaktsü tali tajungba nung angatetdaksür aser na aliba tesem nung temelenshi tajungbener arutsü ajungmesor ta ashi.

Pai iba training nung dena aliba MOs tem dang anogoshi inyakba mapa nung temulung süa mebilemi nüburtem yimya dak apet temelenshi bener arutsü aser nüburtem sadoksayima temang reprangtsü aser alitsüsa tensa bener arutsütsüla ta ashi.

Pai parok dang dangar dak

nungi alia inyaktsü aser temelenshi bener arutsü aser telemtetba agütsü ayongzüka liasü.

Dr Ritu Thurr, Principle Director, DoHFW ajanga training agirtem pela agizükba o jembidang, nüburtem asoshi Primary Health Center ya 'contact point' mezüngbuba lir aser mapa shidak inyaktsü nenok mapa lir, ta ashi.

Medical profession ya temeshi mapa lir aser pa-sasa masü saka asen sasa iba wadang shim, anungji bendanga agütsüshitsüla, Medical yimyatem akumtsübotsüla aser nüburtem nem health care service tajungtiba nung agütsütsüla, ta pai ashi.

Dr E. Motsuthung Patton, Mission Director, National Health Mission (NHM) ajanga iba training ayongzüka nükjidong rateta jembidang, nüburtem nem health care tajungba agütsütsü aser state nung public health system melenshidaktsütsü asoshi doctor tem lungiemer inyaktsü ayongzüka liasü.

CPHC indang tia asadangba mapang Dr Mereninla Senlem, State Program Officer, NHM ajanga ashiba agi, iba sentong ya temang anepaluba mapang sen indokba ajemdaktsütsü aser kishizüng tonga healthcare bener arutsütsü nükjidong nung tenzük.

Iba sentong tenzükba mapang Chunlikha Primary Health Center (PHC) tushia

liasü, koba Ministry of Health & Family Welfare, Government of India nung National Quality Assurance Standard (NQAS) Certification ngua liasü.

Sempet ya Commissioner & Secretary to the MO in-charge of the PHC, Dr Cheyale Kathi agüja liasü.

Iba sentong nung menden ya Dr Manyau, Deputy Director, National Health Mission liasü aser Dr Akuo Sorhie, Director, Health, DoHFW ajanga melepzüng o jemb.

Anogo pongu training nung Medical Officers nem Care in Pregnancy and Child-birth, Neonatal and Infant Health Care Services, Childhood and Adolescent Health Care Services, Family Planning, Contraceptive Services and other Reproductive Health Care Services, Management of Communicable Diseases: National Health Programmes, General Out-patient Care for Acute Simple Illnesses and Minor Ailments, Screening, Prevention, Control and Management of Non-communicable Diseases, Care for Common Ophthalmic and ENT Problems, Basic Oral Health Care, Elderly and Palliative Health Care Services, Burns and Trauma densema Emergency Medical Services, Screening and Basic Management of Mental Health Ailments amala nung training agütsütsü.

Minister Paiwang Konyak-i CHC Tuli semdang



Minister H&FW, P. Paiwang Konyak-i February 13, 2023 nü CHC Tuli nung shirangertem semdangba mapang tangokba noksa nung angur.

Kohima, Tsüklai/February 13 (TYO): Minister, Health and Family Welfare, P. Paiwang Konyak-i Mongulbarnü Tuli nung aliba Community Health Centre semdang aser yangji aliba doctors, staff aser health centre

management committee züngsemtem den sensaksema liasü.

Mongulbarnü Tulu nung BJP senden ka amenba sülen pai CHC Tuli ya semdanga liasü.

Iba mozüki nung inyaker

den sensaksema sülen pai CHC nung metokmeperi aser timtem ajurubatem nungdakba yari reprangtsü ashi.

Minister den staff temi mozüki nung temang anepalua amunger shiranger ajak semdanga liasü.

AHoDs aser HoDs senden February 15 nü amentsü

Dimapur, Tsüklai/February 13 (TYO): Administrative Head of Departments (AHODs) aser Head of Departments (HODs) indang senden ka February 15, 2024 nikingdang 2:00 ako nungi

tenzüka Secretariat Conference Hall, Kohima nung amentsü. Anungji iba senden nung AHODs aser HoDs ajunga medema arua adentsü metetdaksür, ta ketdangsur sangdong ka ajanga ashi.

NEET (UG)-2024 registration atema metetdaksür

Dimapur, Tsüklai/February 13 (TYO): Online agajanga NEET (UG)-2024 registration agütsü atema Directorate of Technical Education nungi sangdong ka agütsüogo.

aliba candidate official NTA website exams.nta.ac.in/neet](https://exams.nta.ac.in/neet) ajanga March 9, 2024 tashinung register asütsü metetdaksü. Guidelines tejangja den fee agütsütsüba osangtsüsang ajak iba website nungya angütsü, ta sangdong ajanga ashi.

Online portal ya February 9, 2024 nung lapok. MBBS, BDS aser Allied courses agütsü jangra

agütsütsüba osangtsüsang ajak iba website nungya angütsü, ta sangdong ajanga ashi.



Mokokchung, February/Tsüklai 12(TYO): Eastern Nagaland Peoples Union Mokokchung, Eastern Nagaland Churches Fellowship Mokokchung teloki Mokokchung Municipal Council Shopping Complex February 3 aonung arongba nung kongshia alir timtemer kija aser kibongtem asoshi teyar sen 40,000/- tanu Mokokchung Deputy Commissioner nem amoktsüdang tangokba noksa nung angur.

Department of Power-i power shidak agütsütsü lenmangtem bushir

Dimapur, Tsüklai/February 13 (TYO): Hydro generating station tem nungi power shidak meyanglutetba ajanga state nung power shortage tebilemtsü jenjang ka tongogo, ta Department of Power ajanga sangdong ka nung ashi.

Councils ajanga dang power transmission aser distribution lines anasa süngdong aser süngkum ama arem mürekba nung Department den yariteptsü mepishia arur, kechiaser iba ama arem ajanga tali timtem agütsür.

Region nung thermal power station aika yanglushitsü atema shibanga lir, aser iba yongji power shortage tebilemtsü tali akumer. North East Region ya tuluba hydro power nung metaloka alir asünung, küm shia tang mapang power agi meperiba ya teti alir, ta sangdong ajanga ashi.

Tang asen state ya dangalen nungi bener aruba power nung shilem 90 metaloka lir. Anungji lokti tentet kechaia power installations nung timtem magütsütsü ayongzüker, kechiaser iba ya ajanga power metokmeperi tali ang akumtsü, ta Department ajanga ashi.

Ajisüaka taküm tali meperiba arur. Yanglushitsü atema thermal power station tulu ka shibangba ajanga power angutsüba tensa tamajungba kumdaktsü.

Teti asoshi Department-i state telungzüng nung hydro power generation project kar tenzüksü inyaktepba mapang lir aser yangji transmission aser distribution lines tasen aser sub-stations tem dena lir. Anungji nüburtem ajangzüksü mechi Department den amalitep akatsü ayongzüker, ta sangdong ajanga ashi.

Küm shia power anguba aser supply agütsüba timba akumer, saka demand ya kanga agi timba kumogo. Tatishitsü agi, State nung 1990s mapang peak demand ya 60MW shi dag liasü, saka tangbo shilem 300 shi agi timba kuma 180MW nungdaker.

HSLC aser HSSLC tatidang aliba angateta Department-i power tajungba agütsütsü mechi mera ajak agir. Iba yongji Purchase Agreements kübok state-i power aliba dang nungi jenjang kanga agi timba nung rondak-nungdak atema NE region alema orr aliba spot market nungi power talila alir.

Ajisüaka peak hours mapang anguba 100MW shi dang lir. Iba den külemi küm shia power alitsüba jenjang timba akumer, ta ashi.

Ajisüaka spot market nung power talila alitsü ya teti peria malir aser mapang shia balala alir. Anungji State nung power tensa tajungba kumdaktsütsü mechi spot market nung aliba ama alitsü meranga inyaker, ta Department of Power indang sangdong ajangasa ashi.

Iba yongji Department ajanga consumer ajanga dang electricity kumdanga amshitsüba kisüng masü saka ita shia electricity bill agütsütsü atema Department den tashi anga menoktsü ayongzüker, ta Department of Power sangdong ajanga ashi.

Department-i District Administration ajanga Village

Delhi Chalo 2.0: Aluyimertem longkak aitba sentong tenzükogo



Delhi Chalo march sentong mapang Punjab-Haryana Shambhu arrtsü anasa aluyimertem adenshir aliba noksa nung ngur.

New Delhi, Tsüklai/February 13 (Agencies): Aluyimertem takhangba dak sendakba nung Union minister ana den sensaksem asema sülen parnok takhangba maneni nenshitsu atema Aluyimertemi Mongolbar anepdang 'Delhi Chalo' march longkak aitba sentong tenzükshigo.

Aluyimertem takhangbatem rongnung alu nungi adokba chiyongtsü balala atema MSP dak sendakba nung legal guarantee agütsütsüba densema lir, ajüsüaka minister tem den senden amenba sülena tangatetep ka danga maurtet aser ibayongji longkak ait tenzükogo.

Samyukta Kisan Morcha (Non-Political) aser Kisan Mazdoor Morcha nati parnok takhangba agizükdaktsütsü atema aluyimertem Delhi-i aotsü ta sangdonga liasü.

Küm ana tejakdang

aluyimba lokti tentet balalai Delhi arrtsü nung ita 16 shi longkak aita liasü, ajüsüaka Modi-i aniba sorkari mepetmesü aketba farm laws asem aginba sülen longkak ait anena liasü.

Tang kasa lokti tentet yagi parnok takhangba nenshitsu atema February 13 nü "Dilli Chalo" march ka ayongzüka liasü.

2020 küm ama mepetmesü adoktsü tsüba Delhi Police-i linük yimtiba nung jenjang aika agiogo aser arrtsü nung longkak aiterem sottsü atema concrete block, merang kojat aser container tem tarensena aika toktsüogo. Maneni Delhi police-i March 12 tashi anogo 30 atema Section 144 (prohibitory orders) benokogo.

Kasa mapang nung Haryana Police-i Mongolbarnü 'Chalo Delhi' longkak aitba sentong dak sendaka aliba lanur telok kati Ambala kübok Shambhu arrtsü

nung tenokdangba agütsür aliba rakpoksü merangba mapang tear gas shells khalokja liasü. Haryana Police-i tenokdangba agütsür aliba tesem nungi ainshitsu atema tekümdangtsü metetdakjaka lanurtem aikati mainshi aser tenokdangba agütsür aliba nung nokdaka liasü, ta ketdangsurtemi metetdaktsü.

Iba sülen lanurtem kari merang atsü rakpoka Ghaggar ayong apu nungi merepzüka yoktsü merangba mapang police temi parnok dak tear gas shells khalokja liasü. Parnokisa teargas shell tsükdaktsütsü atema drone tem amshia liasü.

Maneni Mongolbarnü Uttar Pradesh kübok Noida nunga gari senzusenpong nung tetsükdaktsü adoka liasü, kechiyong aluyimertem longkak aitba sentong ayongzüker aliba ajanga Delhi arrtsü nung security akangshia garitem ajak kanga junga asadanga liasü.

AAP-i Delhi nung menden 6, Guj nung 8 & Goa nung 1 nung toktepnar

New Delhi, Tsüklai/February 13 (Agencies): Aam Aadmi Party (AAP)-i Mongolbarnü INDIA bloc partner Congress den longjemer Gujarat nung Lok Sabha menden ana aser Goa nung menden ka atema candidate tem sangdongogo.

Political Affairs Committee senden sülen linük yimtiba nung osang benertem den sensaksemba mapang AAP national general secretary (organisation) Sandeep Pathak-i, taoba mapang inyakyim dak ajemdaker Delhi nung Congress pur Lok Sabha menden ka nung danga tokteptsü langa mali, ta ashi.

AAP Rajya Sabha MP Sandeep Pathak-i ashiba agi, Venzy Viegas South Goa menden nungi tokteptsü aser kasa mapang nung Chaitar Vasava aser Umesh Bhai Makwana na Gujarat nung Bharuch aser Bhavnagar menden atema tokteptsü.

Pathak-isa, AAP-i Delhi nung Lok Sabha menden tenet nungi Congress nem ka toktsür menden trok atema candidate

tem sangdongtsü, ta ashi. Ajüsüaka pai AAP-i toktepnüa aliba menden trok mesüra Congress nem agütsüba menden ka indang memetetdaktsü.

Delhi nung Lok Sabha menden tenet prongla ya 2014 küm nungi Bharatiya Janata Party (BJP)-i bena lir.

Maneni Pathak-i, Congress den tang tashi menden lemdangtsü asoshi inyakyim tejangja ka maliba ajanga dang temulung retreta iba osang sangdonger ta ashi.

"Delhi nung Lok Sabha menden ka danga Congress-i koka mali aser Delhi assembly nunga ka danga mali. Kiyong 250 nungi Congress-i (2022) MCD election nung menden 9 dang akok. Inyakyim dak ajemdaker Congress pur menden ka danga langa mali. Ajüsüaka data ji dang tongtibang masü. Alliance dharma dak ajemdaker aser akümtsübu agüja onoki Congress nem menden ka agütsütsü renema lir. Onoki tanübo candidate mesangdongtsü. Delhi nung

menden lemdangtsü atema sensaksem takaratiba nung tembangtsü imlar ajita asünungdang mapa tenzükttetsü. Telemtetba ka magiteta taruba anogo ishika tsüngda onoki menden trok atema candidate sangdongtsü aser mapa tenzüktsü," ta Pathak-i ashi.

INDIA bloc nung shilem ka ama AAP aser Congress na Goa, Gujarat, Haryana, Delhi densema state balala nung menden lemdangtsü asoshi sensaksema arudar, ajüsüaka tang tashi telemtetba ka magiteta lir.

Taoba hopta AAP-i ashiba agi, sensaksem agi parnok laktetogo aser takaratiba nung Lok Sabha election atema sensaksemner.

Kasa mapang nung Kejriwal-i February 10 nü par party Punjab aser Chandigarh nung Lok Sabha menden 13 prongla nung parnok kija tokteptsü ta shiogo. Ajüsüaka pai par party maneni INDIA bloc nung densema lir ta nenshia metetdaktsü.

MOKOZÜ MADOKBA MÍ
TATSÜKTIBA MIJANG

KANGA TATSÜK
MÍ AWANGTSÜ TAJUNG
SHÍ AKONGTSÜSA TAJUNGBA
Bamboo Charcoal from Naga Hills

ITEM NUNG YA ANGÜTSÜ

One Roof, Khermahal | Kitchen Queen, near City Clock Tower | Bajrang Hardwares, Opp. Vishal Stores | Grab & Go, Supply PWD Junction | Kitchen Needs, DC Court Police Point

Contact | +91-9436001045

Contact | +91-8787730979 | +91-9856511030 | +91-9612612302

+91-9436002285 | +91-8787584752
www.nagalandbambooindustry.com
nagalandbambooindustry@gmail.com

DIMAPUR
KOHIMA
MOKOKCHUNG

Modi-i 'PM Surya Ghar' yojana sangdongogo

New Delhi, Tsüklai/February 13 (Agencies): Ato Kilonser Narendra Modi-i Mongolbarnü, nüburtem dang pei kilem nung solar panels amenoktsü atema ajungshitsu asoshi benokba scheme dang ya 'PM Surya Ghar: Muft Bijli Yojana' ta ajatsü ta metetdaktsüogo.

Sen crore 75,000 alang scheme ya ita shia electricity unit 300 angati agüja kibong crore ka nem electricity agütsütsü nükjidong nung amenokogo.

"Nüburtem ajanzükdaktsütsü aser sustainable development atema onoki PM Surya Ghar: Muft Bijli Yojana amenoker. Iba project ya sen crore 75,000 intoka inyaktsü aser ita shia electricity unit 300 angati agüja kibong crore ka nem electricity agütsütsü nükjidong nung amenokogo," ta Modi-i X sabang nung zülutsü.

Ato Kilonserisa, iba scheme ajanga beneficiaries tem nem substantive subsidy tem agütsütsü aser sen ya parnok indang bank account-i indang indanga yoktsü, ta ashi.

"Substantive subsidy koba nüburtem bank account-i indang indanga yoktsü, iba nungi tenzüka concessional bank loan densema Centre sorkari

nüburtem nem senotsü dak sendakba nung kecha khuret magütsütsü," ta pai ashi.

Modi-isa, "stakeholders tem ajak National Online Portal ka nung züngoksemtsü aser iba ajanga maparen tayonga kümdaktsütsü," ta ashi.

Tekübokba jenjang nung iba scheme ya nüngtugu kümdaktsütsü atema urban local bodies aser panchayat tem nem parnok tawabangba kübok aliba tesemtem nung rooftop solar systems ajungkettsü atema senotsü teyari agütsütsü, ta PM-i ashi.

Pai ashiba agi, iba scheme ajanga senotsü tali aazükdaktsütsü, power bill tajemba kümdaktsütsü aser mapa adokdaktsütsü.

"Asenoki solar power aser sustainable development atema inyakti. Ni residential consumers aser talisa lanurtem dang https://pmsuryaghar.gov.in nung apply süa PM - Surya Ghar: Muft Bijli Yojana tashi itshidaktsütsü mepeshir," ta Modi-i ashi.

Solar panels amenoktsü atema scheme ya Union finance minister Nirmala Sitharaman-i 2024-25 atema interim budget mapang sangdonga liasü.



BJP lenir Nand Kishore Yadav, Bihar Assembly Speaker mapa atema Bihar Chief Minister Nitish Kumar aser Deputy Chief Minister Vijaya Kumar Sinha na matsüngdang nomination paper file asüba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, FEBRUARY (TSÜKLAI) 14, 2024

Bendangertemiang tauyaba !

Anogo ishika jakdang medemer kati kü dang Nagaland government nung inyaker tulurtem rongnung Naga nungur tulurtem dang nungibo tsümartem ochimashiba, parnokibo nübertem asoshi tajung inyaksü kecha anünga metoktsüi menakrepa chitsür ta shia liasü. Iba o angashir ita majungdang, Nagaland Agriculture department nung Additional Secretary Jitendra Gupta den nisung ana aluyimertem asoshi aruba sen sarua bener Dimapur nungi Delhi-i aodang Income Tax purtemi parnok yangku nung sen lakh 71.50 bena aliba putetba ken o nung Central Bureau of Investigation (CBI) purtemi bushisüngdang tenzüksü atema FIR agütsüba osang angashir. Iba mapaji shitak asünungbo tsümar chanu kati Naga nungur mezüngmeshiba mapa tuluka asütsü. Iba senji par asem ket nung lemsar bena liasü, saka senjibo Jotendra Gupta sahib-ba sen liasü ta angazüker. Nagaland nung tekong lu ayimertem yaritsü asoshi senotsü yokba sentongji Climate-Resilient Upland Farming System (FOCUS) ta ajar aser iba sen nung jagi Jitendra kisüngi mapang tatsüka tsüngda sen crore ana bendentetba tashiji, shitak süra, tesüngmangtsüka aser tejashitsüka lir. Iba senji, ashiko, pa kübok inyaker Naga nungertemiang bendener agüja alitsüa akok. Aji oda, India len nungi IAS officer ka aruba tajangzükji nübertem dang meima parnok lima nung inyakba ama aluyimba nung süshia mesüra industry tapu balala lapoka kechisarina yangluba mapatem nung süshia, inyakyim sayua Naga nungur ama memetetba nisungtem anitetter masü, parnok nem alu junga yimdaktsütsü atema tangari yokba sen dena chitsütsü merangba IAS officerjibo Naga nungur tenzüksü atema masü saka Naga nungur parnok lar kümdaktsütsü asoshi aruba asütsü. Ashiko, iba senji tagibo Gupta-bai agi saka tenüngbo underground mesüra MLA-ba nem tongloktsür asütsüa akok. Iba amaji Nagaland nung Gupta-baji dang masü aika alitsü. Atangji, bendanger chanu kati Naga nungur aluyimer aser sensakertem meyong sen chitsübaji sen agi akoksaba dang nungibo Naga nungur mezüngmeshiba jenjangji tuluba asütsü. Aya ! asenoka kodaser Naga nungur asoshi yokba sen nungi sübokrem crore ana dak tali bendanger ka nem ajemajema sarudena agütsütsüsa asenok alir ta kanga süoki ia bilemdangtsüla. Ashiko, ibaji mapa meinyaki alemba sen asütsüa akok. Asenok jakla nung aji keta lir. Asenoki mapa meinyaki sen aginür, anungji asenok tenüng nung sen arubaji mapa meinyak ser tangar den tiyongi lemdanga agibaji asenok tajangzük tuluka angu amai bilemer. Ajisüaka, iba jagi asenok sensaker aser tangar akar. Naga nungur asoshi sen meyririjang kata aika, anungji sen lakh ta asübajibo aonung pongmang nunga mengudangba Naga nungur aika lir. Aji oda, sen crore anaji tsümarsangji agitsü melen Naga nungur aluyimer nem sen lakh kaka agütsü nungbo, aluyimer noklang ana khen nung takar akümtsü tenzükür süla. Asenok Naga nungurtem rongsen jenjang repringdangra government ita sen dak dang anadaker alir, saka ano iba ita senjia ajunga asen nungdak ljalijong dang tsümartem nem agütsür, kechiyong tayokertemji tsümar aser asenok talir. Iba denji ano government ita sen machirtem asoshi teyari yokba sena mapa meinyak ser tulurtem den lemdanga agitsü janrar teimba, anungji government sentong ajanga anisüngzuka alitsüsa kecha meinyaktetter. Asenok yabo asensasa inyaka takar akümertem masü saka asen meyong shilem agi meteta aser memeteti tangar takar kümdaktsürtem lir. Iba ama asenok dak aketba jakla aser tanü asen tia indang ya bilemdanga asenok mulungzürepa ajepsüla aser asensasa asen dak jashia bilemtsüla. Ibai Gupta-baji tai masü asenok tai nung pasasa lendongi aier asütsü. Naga nungur yimsüsürtema sang, tulurtema sang aser nübertema sang, asenok jakla aser mapa teindang aser shitak asünungbo tangari yamai asen meyong ajak sarudena mechitsütsü aser mezüngmeshia masütsü.

OLEMSABANG

SARASADEM TESEP KOMA ASÜ NUNG TAJUNGBA SÜLA

Rev. Dr. Limatula Lkr.

Oklia

Iba ocet ya Prayer Centre indang nung kü tebilemba kar lemsateper. Prayer centre, sarasadem tesepe ta melentepa dang iba ocet nung amshir, Engraji o-a aika enoksema zülur, iba atema tazünger meijashitsü mepishir. Ajak ajungtsü nükjidong nung prayer centre aser arogo inyakyim metemdanga teyanglushitsü tebilemba kar yangi zülur. Iba onük nung asen lima prayer centre koma inyaka aor iba indangji kü shisatsü yari tongmelang agi tatsüka zülur. Yangi zülua aliba yagi prayer centre shinga maitsür, saka yimkong inyakyim (general) ajitetba nung kü tangatetba yari zülur.

Sarasadem aser tamang yimsü

Arago otsütem lepa repringra, sarasadem sep (prayer centre) ya tanü asen putu nung ajungbena poktetba ka masü, saka arogo tetenzük nungi tenteta aruba yimya ka lir. Tat. agi, Yisu Gathsemene atsüki nung sarasademba (Mat. 26; Mk. 14), Yisu kotaki meyipa tur, nütsüngtem Yirusalemi arur sarasademba (T.Mapa 1). Tejen Lai nunga lumia sarasademba otsü aika zülua lir. Anungji sarasadem ya Khristan yimsü nung teti inyakba mapa ka lir. Sarasadem nung ain lir, sarasademi ajak akoker aser iba tashi ajanga tamangtir ka kümdaktsür. Saka Laishiba nung lumia sarasadem asübaji arogo telungjem kübok inyaka aru.

Alima nung aliba tamangba yimsütem balala repringdangra, sarasadem aser lumiba ya yimsü ajak nung lir. Hinduism, Islam, Buddhism, yamala ajak nung lumia sarasadem yimya tajung aika sayur aser benshia arur. Talisa Muslim nungeri küm nung ita ka lumir. Iba yagi sayur, asenok kechi koda lidir liang tatem nungbo meimchir ajaki Tsüngrem dak atemer. Takar-tulur, sensaker-tilar, tanur- tain ajaki timtem touthi, shisabulu khuret ajak nung Tsüngrem bushir, aser tanebtsü bushia Tsüngrem dangi meyiper. Lumia sarasademba ajanga tanela aser shi nung temoatsü, aser anisüngzük tepela angur. Anungji sarasademji meimchir ajak asoshi tongtibang yinzü ka kobai teyanglur Tsüngrem den tesendaktep adokdaktsür; aser iba jagi meimchir madak temaba teyanglur Tsüngrem ka lir aser Pa ajanga asenok alir ta angateter.

Sarasadem Sep ya Pentecostal telok rongnung adokba mapa ka tanu asen lima nung sarasadem tesepe lapoka aoba ya "Neo-Pentecostal-Charismatic Movement" nungi adokba süngjang lir ta metetdi. Iba movement ya 1960s, 70s nungi tenzuka alima aika nung sashia odaki. Iba sarasadem tesepe ya asen lima nung dang masü, saka alima ajak nung kong revival sashia adoker, yangji sarasadem tesepe tenteta aobaji angutsü. Africa lima nunga asen lima nung adokba amai sarasadem tesepe aika adoka odaki, kasaji Asia lima nunga tesem aika nung sarasadem tesepe adokba angutsü. Iba ya 19th aser 20th centuries nung adokba charismatic movement dang nungi balaka lir. Iba Neo-Pentecostalism nung tongtibang asem arogo nung atalokba angutsü. Itemji: (i) establishment of independent charismatic churches; (ii) charismatic trans denominational fellowships and (iii) charismatic renewal groups within historic mission denominations. Asen lima nung sarasadem tesepe nungji temalen shisema aliba number ana (2) aser asemji (3) inyakdaki aser number kaji (1) joko Dimapur Town nungbo tenzuka meilungi odaki. Item sarasadem tesepe nungji kecha tenokdangba makai kobai onüdir aotsü akoker. Denomination balala telemsa and tetoktepba kecha sarasadem tesepe nung madoker. Mesüra par kin, ozü kin-i lapokba ta telemsa kecha mali. Na asoshi koba tajungba ta südir mashi kati aotsü aser mashi mapang nung aotsü akoker, kechiaser 24x7 prayer centre lapoka alir. Tanabuba nung, prayer centre-tem ya tangar denomination kar arua tenzükba masü, asen nisungtem shirnok arogo nung züngsem tajungtem lir, parnoki tenzükba asünungji iba ya arogo nung asentenshi adokdaktsür telok ka amai lir. Saka item sarasadem tesepe teloktemji jungjunga repringdangra, independent fellowship ama küma odaki. Arogo nung asentenshi janrar teloki lapoka aoba teseptem lir anungji shiangaia nokdangtsü makok. Saka tanü amai dang prayer Centre inyakyim ya inyakyonga aonungbo, ashiko mekümdangra iba yagi independent arogo kümteta aotsü ana nung dang lir. Anungji iba indang ya junga shisadangtsü mapang ka tongogo.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Uganda nung tamanger ka nisung memeteti züka merenshi



Uganda nung Busolwe jila nung aliba mozüki ka nung Philemon Shuha anepaluba noksa nung angur.

Nairobi, Tsüklai/February 13 (Agencies):

Uganda anüdoklen yimtsüng ka nung Khristan kati sentong ka agitsü renemba ngua Muslim nunger temi January 30 nü pa dak nisung memeteti süchia oa azük aser tatsüka lir par kidang mi senlochtsü, ta menur osang ka ajanga ashi.

Arishi küm 34 tain aser tanur asem tebu Philemon Shuha ya Butaleja District kübok Nabiganda yimtsüng nungi kilometre asem pilar industrial area ka nung arishi küm 25 tain Titus Waniyaye den külemi yaritepa moabu nung evangelistic sentong ka atema mapa inyaka aliba mapang pa dak züka merenshi, ta Waniyaye-i ashi.

Shuha aser Waniyaye na January 29 aser 30 anepdang iba sentong asoshi invitations lema liasü. Nisung aika iba sentong nung adentsü aru aser tena ano dangartem aru ata alidang Muslim nunger kar nemnemtepa aruba angashi.

Muslim nunger temi "Kechiba ozü nisung nem Khristanpur zülubanglu lema agütsü? Ozü nisungtem temulung meyipdakja Islam tepsettsü arua na? Tanübo nenok memershi meyochtsü," ta ashi.

"Iba sülen parnoki Philemon atsür ao. Iba mapang ni tera pilar liasü. Ni tsüboa ait aser idangjisa ni jena ao," ta Waniyaye-i Morning Star News dang ashi.

Shuha kumzüksü mechi pai Khristanpur timba sür motorcycle anishirtem telok ka anir ao, ta pai ashi.

"Onok mapang talangka melie iba tesem tonga ao aser timtem agütsürtem tesem balalai jena ao. Iba mapang Shuha ya tasü ama azü agi yimbanger ali nung laoa aliba onoki angu. Pa tenarong anasa tekolak achichilen zübu tuluka liasü aser

mi jangrua liasü, ta Waniyaye-i Morning Star News dang ashi.

"Onoki mi remseptsü merang, saka tia maka ki tulubalen rongdoker liasü."

Onoki bushitepa aodang mi senlochtsür ya mojinü ka nung angu, ta pai ashi.

"Onoki pa dang asüngdangya asü aser iba mapang Shuha'er ki rongdoktsütsü asoshi Muslim nunger temi pa nem sen Uganda shillings 500,000 (USD 129) agütsü ta nangzük," ta Waniyaye-i ashi.

Mi senlochtsüsang ya police ket nung lir.

Shuha kinungtsü aser tena tanur arishi küm 10, 7 aser 5 tain iba lendong nungi meyiru jenbu aser tekülem kidang jenok. Iba osang züluba mapang tashi Shuha ya mozü kidang munga lir.

Shuha'er ki ya Busolwe jila nungi kilometre asem shi pilar lir. Par arogoi Muslim nunger asoshi January 28 nungi February 2 tashi atema outreach sentong ka Nabiganda, Kapisa, Leresi aser Nampologoma yimtsüngtem nung ayongzüchtsü renema liasü. Shuha aser Waniyaye nati January 29 aser 30 anepdang iba sentong nung adentsü jaokba tezülubatema lema liasü.

Uganda nung Khristanpur anema iba ama mapa tamajung inyakba jenti Morning Star News ajanga bendena arur aser Shuha dak züka merenshiba ya tang tesüsa atalokba lir.

Uganda indang constitution aser danga ozüngtem nung pei tamangba yimsü dangar dang sayutsü aser tamangba yimsü ka nungi kati meyiptsü densema tamangba yimsü temeden agüja lir.

Uganda nung Muslim nunger ya nütsüng yongsük shilem 12 dak tema lir aser parnok ya timba linük anüdoklen adenshia alir.

ANOGO ABEN TSÜNGREM DEN

Taküm tsüngkümtem

Kechisarena asoshi tsüngküm ka lir aser anüng kübok mapa ajak asoshi pei mapang ataktetta lir.

Sayutsüngir 3:1

Tsüngrem tsüngküm pezü yangluba nung topur tajungji tsüngküm shia balala süaka, taküm bener arutsü aser indaktsütsü asoshi parnok ajak külemi mapa inyaker. Metsü mapangji tasen poktetba aser taküm tasen. Miwa ainba aser tejang adokdaktsüba. Mangkawang aluruba mapang aser inyaka aruba nung tajangzük anguba mapang. Asükwaji shibangba tsüngküm. Tsüngküm shiadakji temeja topur tajung ka keta lir aser taküm nung tamaittsü aketba teyari agütsür.

Tsüngremi yimya nung tsüngküm yangluba ama, Pai taküm nung tsüngkümtem yanglu. Taküm nung metsü mapang lir, asenoki mapa tasen yanglur aser tarutsü jangraa repranga atar. Miwa arur aser asenoki kümdanga anü pu tatsük nung Tsüngremi asenok nem agütsüba mapa inyaker. Mangkonang mapang arur aser asenok aseni inyakba mapa nung asen taküm nung temeja mapang ka tatembang bener arur. Ken ken tsüngkümü timtem bener arur saka asenoki teimla nung atar kechiaser ano metsü tsüngküm ka asenok dangi arur!

Tsüngremi asenok taküm asoshi tabensa asameyanga yanglu. Pai tejang atangba aser mapa inyakba mapang asameyanga. Pai ajemajema anisüngzüka alitsü tsüngküm yanglu. Kasa mapaji tamang katetta inyaka alitsü asüngdangtsü mapang arutsü. Saka ano idakji jangratem tepela aser tasen tenzükba mapang alitsü. Tsüngrem taochi ajanga asenoki tamang katetta inyakba tejang aongba mapang alitsü. Tsüngrem taochi ajanga asenok tsüngküm temokong aser tejashi madak takok angutsü kechiaser Asükwa meli-i metsü mapang arutsü makok. Yimya nung tsüngküm amaji asenok taküm nung Tsüngrem mulungba abensaa inyaktsü asoshi asenoki taküm nung item tsüngkümtem külemi mapa inyaker.

Cambodia arem nung alir kin asoshi tekülem ki ka yanglutsür



Cambodia anüdoklen Keo Seima natural reserve nung tribal Catholic nunger asoshi tekülem ki tasen ka yanglutsü tenzükba mapang Bishop Pierre Suon Hangly-i 'holy water' rükloktsüba noksa nung angur.

Tsüklai/February 13, 2024

(Agencies): Cambodia sorkar nungi temelaba agir linük anüdoklen wazüka aliba arem ka nung tekülem ki tasen ka yanglu tenzükba ajanga arem nung aliba kin ka nungi Catholic nungertem pelateper ta osang

ajanga ashir.

Iba tekülem ki tasenba yagi Keo Seima nature reserve nung alir Bunong Khristanpur timba akumba nungdang peritsü, ta apostolic prefect of Kampong Cham, Bishop Pierre Suon Hangly-i ashi, shibai February

ita tetenzüklen iba tekülem ki yanglutsü nungshilong azüngja liasü.

Iba sentong nung putirtem, tamangertem aser mamangertem nisung 150 shi dena liasü. Iba nature reserve ya Vietnam den arütsü anasa

Modulkiri aser Kratié province nung lir, kong Bunong densema ethnic tribal kin balala alir, shirnok dang Montagnards ta ajar aser parnok ya Cambodia, Vietnam aser Laos nunga alir.

Bunong (Phnong ta ajar) nisungtem ya akhi mapang nungi süng-long külema aru aser aikati Khristan yimsü agizüker küm ishika jungogo.

June 29, 2022 nü Phnom Penh nungi French MEP missionary Bishop Olivier Schmitthausler-i Bunong putir mezüngbuba John Baptist Bun Prak Hong ya Mondulkiri Province nung aliba St. John the Baptist Church nung ordain süja liasü.

Bunong nunger 50,000 shi arem nung aliba yimtsüngtem nung alir aser parnok ya aluyimba nung metaloka alir.

Iba tesem nung tamanger tali akumba mechi tekülem ki tasen ya yanglur, ta Hangly-i ashi.

(Maneni tapak 8 nung...)

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Shitsülangtem

(n) min tulu nung meiba süngzü (a wild creeper)

* Min tulu nung shitsülangtem süngzü agi sadema mesenzüteter.

Shitzü

(n) shi aontzü (Soup, broth)

* Tanurtemi shitzü mezüa jangratema chiyong.

OLONG PAITEP # 6697

Grid for Olong Paitep # 6697 with numbers 1-24 and shaded cells.

TIPLÉN

- 1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den kulemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ___ tatsu - (3)
12. Tebur kidong aser zünga kasa tsüingda jatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6696 TELANGZÜBA

TIPLÉN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüingdak, 10. Yongya, 11. Kongro, 13. Ora, 14. Ata.

NAI-A YA METETTER MA

The ideal hospetal!



Amul Har pet ko chahiye!

Dairy company Amul-i mapang shia alima nung tatalokba aser onüktem nung ajemdaker graphics aser posters tapu balala amshia arur. Iba sobaliba benshia tang-a Amul-i industrialist Ratan Tata'er mozü ki atema doodle ka lemsatepogo.

Ratan Tata-i azü kanga meimer aser tawa tu pai Mumbai nung world-class animal hospital ka yanglutsü osang metetdakja liasü. Iba atema Amul-i Instagram post ka nung "Ratan Tata's pet project of animals' hospital to come up!" ta zülur doodle lemsatep.

Iba doodle nung Amul tanur tetsür nurse ama subor lir aser Ratan Tata-i azü ka anepaluba sayua lir.

Assam Rifles IG-i Manipur Governor Uikey den ajurutep

Imphal, February 13, 2024

(Agencies): Tawa tasen shimba Inspector General Assam Rifles (South), Major General Ravroop Singh, SM-i Hombarnü Manipur Governor Anusuiya Uikey den ajurutepogo.

Raj Bhavan, Imphal nung pa Governor Uikey den state nung law & order tensa osang lemsatep.

Iba mapang Maj Gen Ravroop Singh-i IGAR (South), Maj Gen Rajan Sherawat, AVSM, USM

meina aru ta PRO Raj Bhavan sangdong ka nung ashi.

Tenati Governor Uikey dang Assam Rifles-i Manipur nung security maparen inyakba osang lemsatep.

Manipur nung tensa tajungba kümdar kechiyong security forces-i kanga junga nüka mitdar ta tenati ashi.

Governor Uikey-ia Maj Gen Rajan Sherawat-i Manipur nung pa lemsükba kümsük inyakdang

mapa tajung inyakba atema tenüingsang agütsü aser tarutsü asoshi moatsü.

Manipur nung yimjung bener arutsü atema central security forces 80,000 tema mapa lemsükba lir.

Meitei aser Kuki nunger tsüingda rara adokba ajanga Manipur nung tensa mejungi lir aser iba rara nung nisung 200 tema taküm samaogo aser 60,000 shi ka pei talidak toktsür jena ogo.

Nisung pezü nem Assam Saurav award agütsü

Guwahati, February 13, 2024

(Agencies): Mongulbarnü tzüwar Elvis Ali Hazarika aser asemteper Hima Das na densema nisung pezü nem Assam Saurav award agütsüogo.

Guwahati nung aliba Srimanta Sankardev Kalakshetra nung Governor Gulab Chand Kataria-i sempettem agütsü.

Iba sentong nung India Vice President Jagdeep Dhankhar-i tongti tesemdanger ama shilem agi.

Elvis Ali Hazarika aser Hima Das na nem saisapongbaren asoshi Assam Saurav award agütsü. Maneni archaeologist Dr Kishan Chand Nauriyal aser Tiwa dance exponent Nadiram Deuri na nem Art and Culture tenüing nung agütsü.

Assam sorkari agütsüba civilian awards ya Bharat Ratna aser Padma Awards ama agütsür.

Iba ya masüidang taoba Chief Justice of India, Ranjan Gogoi nem Assam Baibhab agüja liasü. Iba ya Assam nung highest civilian honour lir.

Külen, nisung 17 nem Assam Gaurav awards agütsü. Parnok tenüing tsüinglanglen agütsür.

- 1. Ranjit Gogoi, Art and culture (Folk & Bihu Dance Exponent)
2. Parvati Barua, Environment & Forest (Animal conservation activist, Human-Elephant conflict expert)
3. Debojit Changmai, Art and Culture (Sound Engineer)
4. Drono Bhuyan, Art and Culture (Oja Pali)
5. Neelam Dutta, Agriculture (Organic Farming)
6. Anupam Deka, Entrepreneur (Industrialist)
7. Soumyadeep Dutta, Environment & Forest (Wildlife

Conservation)

- 8. Basanta Chiring Phukan, Agriculture (Progressive Mushroom Cultivator)
9. Manendra Deka, Craft and Bamboo artist (Handicraft)
10. Meenakshi Chetia, ASHA Worker (Social Service)
11. Pakhila Lekhtepi, Art and Culture (Karbi Folk Singer)
12. Tenzing Bodosa, Environment & Forest (Elephant friendly Tea Estate Establishment)
13. Nirmal Dey, Entrepreneur (Shital Pati)
14. Jecin Kumbang Pao, Handlooms (Weaving)
15. Mary Hassa, AWC (Social Service)
16. Upendra Rabha, Agriculture (Black Rice Cultivator)
17. Rahul Gupta, Agriculture (Hydroponic Farming)

Dhubri nung Rs 2.3 crore alang gold biscuits apu

Guwahati, February 13, 2024

(Agencies): Dhubri district kübok Indo-Bangladesh arrtsülen nisung ana ket nungi Rs 2.3 crore shi alang hon puogo.

Osang tejangja ka angazükba

sülen Golakganj police station officer in charge Debajit Kalita-i anir telok kati Naliya nung e-rickshaw ka mita reprangdang nisung ana ket nung gold biscuits 20 apu.

Tena ya Sona Ullah Sikhdar

asert Tajul Ali na ta jangaogo aser tena ket nung Rs 2.3 crore shi alang hon apu.

Tenati Golakganj nung alir ka nem gold biscuits 20 agütsütsüba liasü saka ibaji masüidang police-i apu.



Assam kübok Barpeta district nung poppy lu nung tedong 82,080 raksatsüogo. Bhatnapaity Char nung menti lu agi miimbanger ali bigha ka tema nung poppy lu ayimba putet aser iba nung poppy quintals 305 shi raksatsü ta Barpeta Police-i ashi. Addl. Superintendent of Police (Crime) Barpeta aser Executive Magistrate, Barpeta nati anir telok kati iba mapa inyak.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA


NOTIFICATION

NO.DTE/ESTT-2/NEET/01/2021-22/In view of online registration for NEET (UG)-2024 portal opened on 9th February, 2024, the intending candidates to undergo MBBS, BDS & Allied courses are informed to register on or before 9th March 2024 through the official NTA website www.https://exams.nta.ac.in/neet

The detailed guidelines alongwith the fees to be paid can be accessed from the above mentioned website.

(Er. VipulhouLhoungu) Director.

Majority lira sorkar tentetang, onok opposition menden nung pelaset amentsü: Shehbaz Sharif



Pakistan nung February 8 nü election agiba dak sendakba nung taoba ato kilonser Shehbaz Sharif-i Mongulbarnü Lahore nung osangbener den jembidang tangokba noksa nung angur. Parliament nung tang shimteta aliba züngsem timba lira sorkar kumtetdang, ta Sharif-i taoba ato kilonser Imran Khan nem tayongzükba agütsü.

Lahore, Tsüklai/February 13 (Agencies): Independent candidate temi sorkar ka kumtetra ozü party opposition menden nung pelaset amentsü, ta PML-N party tir Shehbaz Sharif-i Mongulbarnü ashi.

February 8 nü agiba election nung PTI-i yariba candidate temi menden timba anguba sülen PTI lenir Barrister Gohar Ali Khan-i PML-N mesüra PPP den alliance meyanglutsü tangatetba ajang-ajanga lir ta shir anogo ka lir Shehbaz Sharif-i iba o ya ashi.

"Onoki telok anaprong den temulung sadok-sayim mesüteter. Sorkar yanglutsü atema shinga dena mejembitsü mesüra parnok den külemi sorkar meyanglutsü. Parnok den külemi sorkar yanglutsü dang nungibo opposition nung amen ang tajungba, saka onok majority lir," ta pai osangbener dang ashi.

Lahore nung osangbener den jembidang, February 8 elections sülen PML-N ya political party tuluba kumogo, ta Shehbaz-i ashi.

"Nenoki independent candidates tem züngdangra, parnok timba asütsü. Yangji nai rakteptsü mali. Saka political party tem rongnung PML-N ya mezüngbuba, iba sülen PPP aser yamaji oa lir," ta pai ashi.

Election indang result adokogo, anungji mera agitsü mapang tongogo, ta pai ashi.

"Independent candidates tem, shirnoki PTI ajanga yarirtem mesüra PTI-i meyarirtem ta jembir, parnoki sorkar ka kumtettsü koka lira kumtetang. Tiri parnok mejaoktsü," ta pai ashi.

"Independent candidates, shirnoki PTI sponsored ta jembir, parnoki majority sayutetra, onoki pelaset amentsü aser constitution nung shia aliba ama inyaksü," ta pai ashi.

"Saka parnoki yamaji meinyaktetra, danga political party temi sorkar ka kumtettsü tashi temeden lir. Ibaji ozüng agi melaba aser democratic yimya lir," ta Pakistan indang taoba ato kilonser Shehbaz Sharif-i ashi.

"Asenok tejakleni oa taruba noklem asoshi renemtsü nüngdaker. Political party ajangai pei tanginüba yutsür Pakistan nung tayongzükba balala ajangettsü asoshi teka amteptsüla."

Election nung ochimashi mapa inyak ta political party temi tai tongloktsüba indang jembidang, "Koba elections nung ochimashi mapa inyak ta tai metongloktsüba lir?" ta pai asüngdanga liasü.

Election aonung result shilem 10-12 nung ajemdaker independents temi akoker aser party tem tamakok ajurur ta sangdonga liasü, koba kangadang tim masü, ta

Shehbaz-i ashi. "Külen ochimashi mapa inyak ta tai tongloktsür, saka independent candidate temi takok angur aser onok tamakok angur. Ibaji kanga meputep lir," ta pai ashi.

2018 küm PTI-i sorkar kumtetdang par party-i meta talanglang mejaja, longkak mait mesüra civil disobedience mejazük. Parnoki Pakistan ajungtsü mechi opposition ama shidak inyaka liasü, ta ashi.

Yimtenren tsütsü balala süaka opposition temi iba mapang ato kilonser inyaka alisang Imran Khan den aiben ajurutsü mulunga liasü, saka pai majurutsü ang merang, ta Shehbaz-i tai tongloktsü.

Ozü sorkari ang Pakistan nung democracy kumzük ta pai ashi.

International Monetray Fund (IMF) den tezüngzüktep tasen ka yanglutsü asü ta asüngdang dang, "Tang asen linük rongsenketzüng jenjang asadangra, asenoki IMF teyari ano meshitsüla aser memonui meshitsüla," ta pai langzü.

Osangbener temi Shehbaz dang party tetsüti aser teti Nawaz Sharif ato kilonser akumtsü indang asüngdanga liasü.

"Nawaz Sharif pezüben buba ato kilonser akumtsü ta ni tamalen shia aliba nung ni tang tashi nokdaka lir," ta Shehbaz-i ashi aser teti ato kilonser inyakba mapang takok angubattem bilemteta jembir.

Pakistan Democratic Movement mapang pai ochimashi ajemdaktsütsü meranga inyak ta ashi.

Independent candidate kar PML-N dangi meyipba indang asüngdanga mapang, election nübuyim mapang PTI-i par party anema o tamajung jembir, ta ashi. "Ajisüaka PTI-i yariba independent candidates temi sorkar kumtetnura parnok nem constitution tashi agütsütsüla ta Nawaz Sharif-i ashi. Saka nüburtemi pei sasa mulungteta PML-N nung adentsü jangra lira, yangji kechi timtem ali?" ta paisa ashi.

SÜR KÜM KA AJUNGER



Lt. Mrs. Meyamenla (Dibuia) Tasüba : 14.02.2023

Temeim Oja, nai onok toktsür orr küm ka süitema aruaka, anogoaben nü menüremjak onoki bilemteter aser nü jakla tajung, temeim shisatsü onok den teti lir, Nü sarasadem aser mapa tajungtem menungra bilemteter.

Temeim Kinungbo, Jabaso, Semchirtem aser Kinungertem.

"Kibubai agütsü aser Kibubai bener ao, Kibuba tenung moajang" (Yob 1:21)

"Yisu nai ni meimer, nia na meimer"



06.06.1944 - 04.02.2024

Onoki teti meima aliba Ojala Lt. Sennungshila (Chuchuyimlang) ajungben alima nungi pilar melung zürepa aliba mapang ozü den asüko lemsaa ana aser talang nungi, kija kibong, kiyonger, Yimer aser lokti balala nungi shirnokisa nübo rongsen aser sarasadem ajanga yaritepogo nenok ajak dang tsüngdong arua meshittakasa iba osang ajanga pelaba lemsateper.

Asen teyanglur Tsüngremi nenok mapa tajung asoshi moajang ta ozü sarasadem.

-Temeim Kinungertem

Taoba Thailand PM Thaksin Shinawatra tepuokdak nungi chioktsü

Bangkok, Tsüklai/February 13 (Agencies): Tepuokdak yua aliba taoba Thailand Ato Kilonser Thaksin Shinawatra chioktsü renema lir.

Arishi küm 74 tain Thaksin, chubai taitok magütsü tsüngda, pai sorkar tashi alia amshiba atema küm ti tepuokdak ayutsü obendang agüja liasü pa parole nung chiokogo, ta Ato Kilonser Srettha Thavisin-i Mongolbarnü osangbenertem dang ashi. Thaksin küm ti tepuokdak ayutsü obendang agütsüba ya chubai taitok agüja küm ka dang kümstsü aser tang parole nung chiokogo.

Srettha-i, pa chiokba osang ya official osang lir ta ashiba den, inyakyim ajak temzüng ozüng dak ajemdaker inyakogo. "Pa chiokba sülen aki ama lisopur ka akümstsü. Taoba mapang kechi atalokogo aji ajak süitemogo," ta PM-i ashi.

Küm 14 tashi bendanglima lila aliba sülen Thaksin ya taoba küm August ita Thailand-i meyipa aru, aser pa linük tonga aruli okadaki anir ao, kong pai tashi alia amshiba atema küm ti tepuokdak ayutsü obendang agüja liasü.

Thaksin aonung ka dang tepuokdak ayipba sülen blood pressure kanga high akümiba ajanga mozükidangi anir oa liasü. Iba sülen mapang tatsüka dang lir chubai taitok agüja

tepuodak ayutsü atema küm ka dang kümstsü.

Justice Minister Tawee Sodsong-i, Mongolbarnü taitok agütsüba tepuoker 930 rongnung Thaksin densema lir aser pa February 17 nü chioktsü imlar, ta ashiba Thai media sangdong balala ajanga metetdaksü. Thaksin ya tain akümiba aser health majungba ajanga taitok agütsüogo.

Thaksin ya 2001 küm PM aküm aser iba sülen kümpongu lir pai maneni takok angu ajisüaka military-i coup süa sorkar atsünga liasü.

Thaksin, shiba meimchir temeden anema inyaksangshiba atema aija lir pai tashi alia amshiba atema aitsü saka pa bendangleni jena ao aser timba Dubai nung liasü.

Srettha ya Thaksin'er jala tanutsüla Paetongtarn Shinawatra-i aniba Pheu Thai Party nungi lir. Taoba küm May ita election akokba sülen parnok sorkar kumtet. Election nung progressive Move Forward Party-i vote timba angu ajisüaka military aser sobaliba tsütsü tongtibang nisungtemi tenokdanga agütsüba ajanga parnok sorkar mekumtet.

Srettha-i Mongolbarnü ashiba agi, Thaksin-i linük ajangzüktsüogo aser pai linük tenzüktsü atema par jala nem shisatsü tajung agütsütetsü.

Russia-i Dnipro nung power plant ka raksatsü

Kyiv, Tsüklai/February 13 (Agencies): Russia-i Mongolbarnü missile aser drone amshia Ukraine teyongtsü nung Dnipro yimti amak aser iba mapang power plant ka raksatsü.

Yimti amakba sülen ketdantsürtemi school tem shibangtsütsüsa aküm aser mozükitem nungi nüburtem anina liasü, ta Ukraine nunger ketdangsürtem aser media sangdong balala ajanga metetdaksü.

Yimti kong nisung million ka shi lir, iba yimti ya missile ka aser drone tem amshia anüolentip, anütoklen aser anütoktip len nungi maka liasü, ta Ukraine indang Air Force-i Telegram

messaging app ajanga metetdaksü.

Air Force-isa parnoki drone 23 nungi 16 khazüka yokba metetdaksüogo.

Ukraine indang private energy provider tulutiba DTEK-i ashiba agi, thermal power plant ka kanga mejungi raksaogo. Lendong nung nisung asüba osangbo kecha mali, ta parnokisa metetdaksü.

Company-i power plant ya kong amenoka liasü, iba indang osang magütsü saka Dnipro indang water utility company-i Telegram ajanga ashiba agi, power maliba ajanga tzü supply ken atema anena ata aser Ukraine media outlet balala ajanga ashiba agi, Dnipro nung

power plant ka dak kongshio.

Regional governor Serhiy Lysak-i, energy infrastructure ka dak kongshio ta ashi ajisüaka paia osang tejangja magütsü. Paisa, yimti kolak nung drone 10 raksatsüogo, ta ashi.

Kasa mapang nung Dnipro mayor Borys Filatov-i ashiba agi, ketdangsürtemi tesem ka nung school tem shibangtsüdar aser mozüki ka nungi nüburtem anin tenzükogo.

Russia aser Ukraine napronglai ita tsüngda anüng nungi tesem balala tali amak tenzükogo aser talisa tongtiba energy, military aser transport infrastructure tem maka arudar.

DDBA-i Nagaland Olympics atema asayartem sangdongogo



Dimapur, Tsüklai/February 13 (TYO): Dimapur District Basketball Association-i Nagaland Olympics & Paralympic Games nung basketball asaya koba February 15 nungi 17 tashi asayatsü lir iba atema Dimapur district tetsür aser tebur team sangdongogo.

Captain Rilise Thonger-i anir tebur team nung Chumbenthung Lotha, Bendang Jamir, Tsentsuthing L Kithan, Rajan Nayak, Imsuren Longchar (VC), Abhishek Singh, Rahul Leonard, Kamlenmang Andrew,

Tovika Awomi, Rongsennungba aser Marshal Pashel nung densema lir. Iba team ya Imchenchang Imchen-i achaayangtsü aser Moawabang coach asütsü.

Tetsür team nung captain Kenyuni Keppen asütsü aser asayartem rongnung Sosentetla Aier, Pelekhonuo Kuotsu, Kivitoli Ayemi (VC), Kevingunuo Terhujia, Lituna Sukhai, Moidan Phom, Achumbeni Ngullie, Tongpangrepla Longchari, Lunshila Quinker, Imchakumla

Longkumer aser Maria Gorretti nung densema lir. Tetsür team manager Hinoto Chopi aser coach Alanthung Ngullie asütsü.

Kasa mapang nung Dimapur District Basketball Association-i, parnok maneni nongita yariba atema JV Foundation, sponsors, team pusemertem aser nüburtem ajak dang kanga pelaba lemsatepogo. Iba asayamung nung district team-i kanga junga asaya konang tetushi bener arutsütsü imlaba DDBA tir Sentiningsang Longkumer-i lemsatepa liasü.

Col. C.K Nayudu Trophy: Nagaland team final-i iogo

Dimapur, Tsükali/February 14 (TYO): Col. C.K Nayudu Trophy 2023-24 (Men's U23) nung Nagaland aser Arunachal na Lal Bahadur Shastri Stadium, Anand nung Semi-final (Plate) asayaba Nagaland U23 team-i run 148 agi kokogo aser parnok Meghalaya den final asayatsü.

Toss akokba sülen Nagaland team-i mezüng bat asütsü shim aser parnoki mezüngbuba innings nung asayar ajak out sür run 171 yanglua liasü. Nagaland team atema Afzal-i out mesüi run 81 yanglu aser Hem-i run 20, Tohuka-i run 16 aser Samuel Zaputou-ia run 16 yanglua liasü.

Arunachal team bowler tem rongnungi Amarjeet Sharma-i wicket 3, K Jangra-i 2 aser Dol,

Techi, Mibom aser Leki nungeri wicket kaka agia liasü.

Mezüngbuba innings nung Arunachal team-i kanga junga asaya aser parnoki run 219 yanglua parnok tejakdang liasü. Parnok rongnungi Prince Yadav-i run 69, Amarjeet Sharma-i run 63 aser T Sania-i run 23* yanglua liasü.

Nagaland team bowler tem rongnungi Hem-i wicket 4, Raja-i 3, Neizekho-i 2 aser Dip-i weicket 1 agia liasü.

Tanabuba innings nung batting amenba mapang Nagaland team-i run 290 yanglua liasü. Parnok rongnungi Hem-i run 139 yanglu aser pa nem Tohuka (run 77), Afzal (run 25), Mughavi (run 17) aser

Sujal (run 17) nungeri teyari agüja liasü.

Arunachal atema R Jangra-i wicket 4 agi aser Dol o Tech i nati wicket 3 aser 2 agia liasü.

Asaya akoktsü atema run 242 arishiba mapang Arunachal team-i asayar ajak out sür run 94 dang yangluteta liasü. Nagalang team atema Neizekho-i ball kanga junga ona wicket 5 agi aser Hem o Raja nati wicket 2 aser 1 agia liasü.

Arunachal team atema Vishek Kumar (run 29) aser Prince Yadav (run 18) nati dang tera junga asaya liasü.

Meghalaya den final asaya ya Nagaland Cricket Stadium, Sovima nung February 18 nungi 21 tashi asayatsü.

Badminton Asia Team Championships nung India team asayadar

Tsüklai/February 13, 2024 (Agencies): Badminton Asia Team Championships 2024, February 13 nü nungi tenzüka Shah Alam, Malaysia nung asayadaki.

Iba asayamung nung tetsür aser tebur asaya balala asayaba angutsü. 2024 Badminton Asia Team Championships nung India nung nungtugu asayar HS Prannoy aser Lakshya Sen na tebur asaya nung shilem agidar aser tetsürtem rongnungi PV Sindhu-a asayaba angutsü, shiba yiruba ajanga mapa tatsüka junga masayateti arudar.

Iba asayamung nung India nung asayar 20-i shilem agitsü.

Badminton Asia Team Championships 2024: India squads

Tebur: HS Prannoy, Lakshya Sen, Kidambi Srikanth, Chirag

Sen, Satwiksairaj Rankireddy, Chirag Shetty, Dhruv Kapila, M R Arjun, Suraj Goala, Pruthvi Roy

Tetsür: PV Sindhu, Anmol Kharb, Tanvi Sharma, Ashmita Chaliha, Treesa Jolly, Gayatri Gopichand, Ashwini Ponnappa, Tanisha Crasto, Priya Devi Konjengbam, Shruti Mishra

Badminton Asia Team Championships 2024: India's schedule (As IST)

February 14

6:30 AM: China women vs India women

10:30 AM: India men vs Hong Kong China men

February 15

10:30 AM: China men vs India men

February 16

7:30 AM: Quarter-finals

February 17

7:30 AM: Semi-finals

February 18

7:30 AM: Finals

Badminton Asia Team Championships 2024 Groups

Men Group A: People's Republic of China, India, Hong Kong China

Men Group B: Malaysia, Chinese Taipei, Kazakhstan, Brunei

Men Group C: Japan, Thailand, Singapore, Myanmar

Men Group D: Indonesia, Republic of Korea, United Arab Emirates, Saudi Arabia

Women Group W: People's Republic of China, India

Women Group X: Indonesia, Hong Kong China, Kazakhstan

Women Group Y: Thailand, Malaysia, United Arab Emirates

Women Group Z: Japan, Chinese Taipei, Singapore.

ATP Rankings nung Sumit Nagal Top-100-i iogo

Tsüklai/February 13, 2024

(Agencies): India nunger tennis asayartem rongnung temaba jenjang nung aliba asayar Sumit Nagal Hombarnü sayaba ATP singles rankings nung jenjang 23 tejakdangi tua pa indang career nung tang mezüngbuba top-100-i iogo.

Deobarnü Chennai Open challenger event akokba sülen Hombarnü sayaba rankings nung Nagal 98bubai tuogo. Teburtem rongnung Serbia nung asayar Novak Djokovic maneni temaba jenjang nung lir.

Taoba ita Nagal ya India nunger rongnungi küm 35 nung Grand Slam ka nung seeded asayar ka akokba mezüngbuba asayar aküm. Pai Australia open mezüngbuba round nung Kazakhstan nunger world no.27 asayar Alexander Bublik koka liasü. Ajisüaka pa tanabuba round nung China nung asayar Juncheng Shang-i tsükdaktsü.

2019 küm left-handed asayar Prajnesh Gunneswaran-i top-100 tongtetba sülen Nagal ya India nunger asayartem rongnungi iba alizüng tongtetba mezüngbuba asayar kümogo.

"Ni kanga dang pelar. Tennis asayar ajaki top 100 danga atongtsü asoshi bilemer. Taoba mapang ashiba ama kidang aser linük nung fan tem matsüngda iba asaya akokba ya jangrademtsüka aser iba dang nungi tajungbabo kecha mataloktsü ama bilemer," ta Deobarnü Chennai Open akokba sülen Nagal-i ashi.

"Onok ajak o mejembi jeptepa liasü. Ni tang tashi kanga emotional lir. Taoba küm kanga dang tasak liasü, ni jenjang 500buba nung liasü aser iba den surgery agi aser senotsü teyaria monguteti liasü.

"Tia tensa balala ajangaogo aser anogoshia meranga inyaka iba jenjang tongtetba atema ni kanga pelar," ta Nagal-i ashi.

KHRISTAN OSANG : Tapak 5 nungi...

Cambodia arem nung alir kin...

Iba tesem nung Catholic nung 70 aser catechists 15 lir aser nisung aika Catholicism nung adentsü imlar.

Tsüngrem osang sangdongba nung iba tekülem ki ya tiyong asütsü, tesangwa aliba tesem aser yangi aliba nübur ajunga dang Tsüngrem temeim sangdongba tesem ka asütsü," ta Hangly-i ashi.

"Iba tekülem ki ya tilaka dang süaka nüburtemi yangluba tekülem ki ya asen müketa alirtem asoshi Tsüngrem taochi indang tesangwa asütsü, anungji parnoki Yisu indang metettsü aser parnok kumzüksü," ta pai iba tenlaki yanglutsü asoshi nüngshilong azüngtsüba mapang ashi.

Cambodia nung aliba Bunong nisungtem timba 1970s civil war mapang aser Khmer Rouge yimli mapang Vietnam-i jena ao. Pol Pot yimli atsüngdokba sülen timba meyipya shilang.

Vietnam nung refugee ama Bunong nung kar Paris Foreign Mission Society (MEP) nungi aruba missionary tem nungi teyari agia liasü, shirnoki parnok nem chiyongtsü aser tejenokdak agütsü ta ashir. Iba ama mapa tajung inyakba ajanga Bunong nung kar Catholicism agizüktsü ajungmeso.

Mondulkiri province nung Catholic nungertem repranger putir Father Jean Marie Vianney Borei Phan-i ashiba agi, 2009 küm Bunong nung kari Vietnam semdangba

mapang Catholic nungertemi sensaker aser shirangertem yariba ngua Bunong nung tali Khristan akum.

Keo Seima arem nung aliba Bunong nungertem Catholicism nung adenba ajanga pastoral care agütsütsü mechi yangji aliba arogo kati mission station tilaka amenok, ta pai ashi.

Provincial government-i tekülem ki yanglutsü mela aser iba yongji arogo ketdangsüri tekülem ki yanglutsü tenzü. Iba tekülem ki tasenba ya küm ka tsüngta renemtsü imlar, ta pai ashi.

Cambodia nung Catholic yimsü ya Portuguese Catholic missionary temi 16th century mapang bener aru. Civil war matong tashi Cambodia nung Catholic nung 62,000 shi liasü.

Khmer Rouge regime (1975-1979) mapang bendanger missionar tem ajunga reshikangshia amshiba aser meindokba ajanga arogo tesamar akum. Yangji aliba bishops, putirtem aser Catholic nung ajak reshikangshia amshi aser tepset.

Ajisüaka 1990s mapang missionary tem tanaben aruba sülen arogo tenzüksi.

Tanü Cambodian Church nung Catholic nung 20,000 shi lir aser parnok ya timba bendanger missionary temi tenzüker. Liyonga arudang local church nem par nisung nungi putir ter aser nuns ter agüja liasü.

BILEMDANGANG

"Nai nüsasa dak tamang katetra ajak akoktsü."